Ode to Italy.

Sorry, Dante.

Lead me tae the Land o Sun Where lassies smile sae prettily; The land o music, song and fun, The happy land o Italy.

Though here yer life be grey an flet, Ower there ye'll live mair happily; Nae torn-faced get will take the pet Tae spile yer day in Napoli.

What better than a bonnie lass, Tae kiss, caress an fondle her, As doon the Grand Canal ye pass Reclinin in a gondola.

And if ye hae some time tae spare Tae linger doon Salerno wey Then it will please a damn sicht mair Than bidin oot Balerno wey!

A wheen o artists Florence drew, A flood o talent wis let flow; An scuddie statues you may view Aw carved by Michaelangelo.

Dante's Inferno's sae precise That I ken where he really went, For Italy's a paradise An Hell he modelled on Tranent.

Italian talent in the Airts
Beams oot wi bricht an glorious gleam,
But what endears tae Scottish herts
Is their invention o ice cream.

Italian genius I'm shair Will beat aw ithers ony day; And also ye should be aware They thocht up macaroni tae!

I've tried the-day tae hae ma say Baith cheerily an wittily, Sae maybe noo ye'll gaun away An hae a look at Italy.